



## 新族群

佇遮欲講的族，毋是咧講人種，和皮膚的色綴恰血緣攏無牽連，顛倒是恰人的慣勢有關係。

佇我的記持內底，上早出現的就是「單（獨）身貴族」，我想查埔、查某的攏算在內。個應該是想欲家己一个享受自由自在的人生，才無想欲嫁娶的款。既然講是貴族，當然大部份人著愛是尻川鬥柄的好額人。

早一站仔，閣有咧時行 DINK 族，這是對英語的“Double Income No Kids.”這句話來的，就是講一家兩人領雙薪，無愛生囝、抑是育飼囝仔的人，當然生活上比較較享受，有袂少人綴咧時行，咱臺灣少子化，毋知和這有關係無？

另外閣有一款「草莓(tsháu-m̄)族」，這陣人一般攏是青少年，因為咱臺灣少子化的關係，逐口灶的囝仔，逐個都攏是糖霜丸，毋甘予伊艱苦著，所以囝仔就恰「草莓」差不多，較袂堪得有壓力。

繼落來嘛有一款號做「米蟲」族，華語講做『靠爸族』，咱取諧音叫做「哭爸(khàu-pē)」族，嘛有人講是『啃老族』、NEET 族（英語的全名是『Not in Employment、Education or Training』，也就是升學、就業、進修恰受訓攏無愛的人），大部份就是欲食毋討趁、無法度抑是無想欲靠家己生活的族群。

上新的一族就是「向(àn)頭族」，華語講做『低頭族』。便若踎佇車內、路裡、便利商店、餐廳……個攏是不時頭向向(àn-àn)，一手提一支 3C 的產品，另外一手踎面頂擡咧擡咧。這個族群的人愈來愈濟，對小學生起到中年人、半老老(puànn-ló-lāu)的攏有。根據專家的研究，這個新族群的人，目矚會較緊老化，嘛比一般人加誠勢發性地。

以上遮的新族群有的漸漸會退時行，嘛不時有新族群咧出現，有一工，新族群無定著是濟甲會講袂盡喔。

作者：陳憲國

### ☆詞彙學習☆

【慣勢】kuàn-sì：習慣、習性

【尻川鬥柄】kha-tshng-tàu-pènn：屁股帶根柄，意為「好擗(hó-giáh)」，與「好額」諧音，指有錢人

【時行】sî-kiànn：流行

【逐口灶】tāk kháu-tsau：每個家庭

【便若】piān-nā：每次……

【半老老】puànn-ló-lāu：中老年人